

# Pírípái

## Ebeq sáhnsahwe ahtebé ehwehne.

Pírípái suwahpeqme Másérónía marákórápéq kowe. Poraga mibeqté keyábé anotahtaq arutaboireña mah pahsí sehiranúwe. Mah pahsíípéq wega mó naneq mó naneq ehwéh sehiranéna sega Sísane sánsá ambubu atawéq kawerue sehigigeheéna mah pahsí sehiranúwe. Sega mótaq mótarue Pora móne nánúwana wega sensabé kawerowe aritowe. Wega sensabé, Ahriahri iru eyoyóéq iwíáh íwíáhoró úwe.

## Poraga Pírípái suwahpeqte ké siu pahsíe.

**1** <sup>1</sup>Pírípái suwahpeqte kéó, íné Porane páhsi sáhnsahwe tagahro. Moke Sísá Karáhéne animárnseq wahnahno kereq séhréh arító kéréro, mah pahsí kawerue tagahro. Ínéreq Tímótireqka Sísá Karáhéne arambehriúya anité úye. <sup>2</sup>Maniká Iteriboreq itene Wahnah Sísá Karáhéreqka ite séhréh aitera itene iru ukiq itagéhe.

## Poraga Pírípái ke púrerarito ehwéhne.

<sup>3</sup>Itensabé niahreraq kéhtáq ahriahri Maniká Iteribonsabé kaweróne atena iwíáh íwíáh atóge. <sup>4</sup>Itensabé púreraitótáq ahriahri nirupipeq eyoyóirana púreraitóge. <sup>5</sup>Ínéga Sísane kaweq ehwéh téh teíátáutaqkákáq amahnágaákáq séhréh aintáhwe. Séhréh aintáh púana itensabé púreraitótáq ahriahri nirupipeq eyoyóirana púreraitóge. <sup>6</sup>Íné aiq tagaríomé Maniká Iteriboga itene irupipeq kaweq arámbéhrí áhwáraraire. Mi arámbéhrí íre túbáh agia Sísá Karáhé tuinagake Manikánka parabaruanawire.

<sup>7</sup>Manikánka Sísane kaweq ehwéh koreri terinúno urairana tábúsoqme koreri terinuraqge. Sísane kaweq sansánsabé ehweho kereq moq teri terinuraqge. Teri terinurautaqkákáq amahnága karábúsiipéq míótáqkákáq mi arámbéhrí mirainkeheéq itega náni náninéq séhréh aintáhwe. Minayabe itensabé ahriahri nirutaboiritóge. Mira íwíáh aitómé aiq tábúsoqme iwíáhuge. <sup>8</sup>Manikánka aiq tagaríéhmé Sísá Karáhéga itensabé arutaboiritena íné mira íwíáh aintéh púana ínéga itensabé moq nirutaboiritóge.

<sup>9</sup>Itega mó keyábé anotahtaq irutaboiraritageheéna itensabé púreraitóge. Irutaboiréq ahte bia ké tábúsoqme iwíáho ke míageheéna itensabé púreraitóge. <sup>10</sup>Mina tahnsa ké míéhrrataq ite peh kaweq sansá omaq itahráhire. Peh kaweq sansá omaq itahráhinsabé mirairataq Sísá Karáhé tuinagake ite íre ahabábq ke méq peh kaweqtaq míagehe. <sup>11</sup>Sísá Karáhéga séhréh aita hna ite peh kaweq ke míagehe. Ite tagehra kegá Maniká Iteribo áwíq pankerera wensabé iwíáh íwíáh atagéhe.

#### **Pora karábúsiipéq mío ehwehne.**

<sup>12</sup>Néne iyahnabo anímáríno, mah ehwéh iragéhboq kawerue írátíáhiro. Ínéga Sísá Karáhéne arambehri miraunaunsabé saiqnaintera karábúsiipéq íntárówe. Íntáróme sega kaweq ehwéhmé íre saiqnariahrahowe. Írakaumo. Sega íné karábúsiipéq íntárónka kaweq ehwéh íre saiqnaruto puana peh págegeue abae aguraire. <sup>13</sup>Minawé moke mahtaqté wáhnáhné sóntía kereq mó kereqka tagaríahwe. <sup>14</sup>Íné karábúsiipéq míónsábé kaweq ehwéh abae agurairara áhnte Sísá tagaríáh kegá íráhwe. Íráhwana itene Wahnahka séhréh arítéhrra sega moq íre áhrea Manikáne ehweh pahsúáhwe.

<sup>15</sup>Táhmáro kegá néne arambehri tagéra, Ite moq anotah anímárí míaneheqmúne iwíáhéra Sísá Karáhé éhweh teri terinowe. Mó kegá peh kawerue iwíáhéra mi ehwéh teri terinowe. <sup>16</sup>Ínéga Sísá Karáhé éhweh pahsutaunsabé karábúsiipéq móíntárówe. Minawé kaweq kegá tagéra ínénsabe sirutaboiréra Sísá éhweh teri terinowe.

<sup>17</sup>Íre kaweq iwíáho kegá sensíwíq pankeranehe iwíáhéra, Amahnága Pora karábúsiipéq míéhnsábé we kamah aweneheéq Sísá éhweh teri terinonehe ewe. <sup>18</sup>Minayabe abia hnsanugo? Írakaumo. Nirupipeq eyoyóire. Mó terié ké kaweq iwíáhowara mó terié ké íre kaweq iwíáhowe. Moke sega Sísá Karáhé éhweh teri terinonsabé nirupipeq eyoyóire.

#### **Poraga Sísareq méyabe awahbó ehwehne.**

<sup>19</sup>Itega ínénsabe púreraintáhnká Sísá Karáhéne Awanka séhréh aintéhrra karábúsiipéqté pugeq nuwagéhe iwíáhuge. Mira iwíáhunka nirupipeq eyoyóire. <sup>20</sup>Mókakeakák peh eyoyóinae. Wega níátái arámbéhrí kawerue mirainieéna anotah nirútábóíruge. Niyehitegurégúonehoéna mi arámbéhríyábé kawerue mirainauge. Íné íre áhrea peh ahriahri Sísá Karáhé éhweh teri terinuraunserah amahnágaakák pahsuqme terieyabe nuwahbehre. Miraonaraq oga míanabu pukinabugapómo néne arambehri tagehra kegá Sísá Karáhénsabe iwíáh íwíáh atagéhe.

<sup>21</sup>Íné oga mío tánáhráq peh Sísá Karáhéreq mía míainie. Íné pukonaraq weba mía míawone anotah kawerinawire. <sup>22</sup>Íné mah marákóipéq oga míáhnaraq mó kaweq arámbéhríéna áhnte ke séhréh

aritahráhuge. Minayabe anerininkono? Íre tagaríoge. <sup>23</sup>Anerininkono íwiáhéna téhtaré íwiáhuge. Niru eyoyói sansámé néne ninonka suena Sísaba pokéyabe nuwahbehre íwiáhuge. Sísaba pokéyabe níranawe <sup>24</sup>peh mahta q ména ite séhréh aitahráhuge íwiáhuge.

<sup>25</sup>Ite séhréh aitahráhuge tagarío púana mahta q ména ite séhréh aitanauge. Ínéga ite séhréh aítáhnaga ite Sísane sánsá ambubu atíéhra puana itene irupipeq eyoyóinae. <sup>26</sup>Ínéga iteba konaraq íné tagéq Sísá Karáhénsabe iwíáh íwíáh atagéhe.

### **Itene naruoga íwíoqnah ehwéhne.**

<sup>27</sup>Anotah ehwéh teiníboq írátíáhiro. Sísá Karáhéne kaweq ehwéh tábúsoqme sehgióro. Sehgirataq itega peh morá íwiáhue kaweqtaq mía míaigehe. Kaweqtaq mía míaéq moráénue Sísane sánsá ambubu atawéq wene ehweh teri terinigehe. Mirairataq iteba konaraqpópoq mahta q míáhnaraqpópoq ite kaweqtaq mía míaohwéh iraníe. <sup>28</sup>Itene naruoyabé íre áhreoero. Sensabé íre áhreirataq itene naruoga mina tagéra iwíáhéra, Ite pukoneheqmúne. Peh moró Manikánka Pírípái suwahpeqte ké séhréh arítéhnsábé kaweqtaq míaneheqmóe siahtebagehe.

<sup>29</sup>Manikánka itensabé, Sísansabé aiq pútare atáhiro éna néne arambehri miraoro. Miraéq wenáwíq pankeréhraqmé itensabé suwahrieh kegá íwíoqnagehe ire. <sup>30</sup>Menah ínéga Sísane arambehri mirauraunsabé níwíoqnarowaq tagarowe. Amahnágaákáq Sísane arambehri miraunsabé mó kegá níwíoqnah ehwéh itega íráhwe. Itereq ínéreqka ahababáq saiqnarueq peh morá árámbehriúne. Minayabe Sísane ehwehnsabé suwahrieh kegá íwíoqnahwe.

### **Moráénue séhréh atéhero i ehwéhne.**

**2** <sup>1</sup>Itega Sísá Karáhéreq mía míaowana aiq págege aitehro? Wega itensabé arutaboiraítéhnsábé itene irupipeq eyoyóiro? Itereq Manikáne Awanseqka moráénoo? Itega mó ke séhréh ariteq sensabé irutaboiroo? <sup>2</sup>Kowe irataq moráénoro. Mó keyábé irutaboiraiteq wensabé wensabé arutaboiraítéhero. Peh morá iwíáhue míáhiro. Ite mi ehwéh sehgiranka nirupipeq eyoyóinkehe.

<sup>3</sup>Itene arambehri mirairataq peh iteitensabé iwíáh íwíáhiyeho. Ite mó ke kiotaikuna ke úne íwíáhiyehboq íre píribahrioro. Írakaumo. Mó kegá ite kiotaikowe íwíáhéq uwarena ké míáhiro. <sup>4</sup>Íre peh morá iteitene arambehriyabé auráq matíáhiro. Itene iyahnabone náneq moq iwíáhue séhréh arítáhiro.

### **Sísaga, Íné anotah aní múge íre ú púana Manikánka wenáwíq pankero ehwéhne.**

<sup>5</sup>Sísá Karáhéga iwíáhúnserahnoro. <sup>6</sup>Wereq Manikánseq senahnáera monseráhnuye. Minayabe Sísaga, Íné Nánibo míéhraq peh we tahnsá

anotah Wahnáh ání míanauge íwíáhuwo? Írakaumo. <sup>7</sup>Ite kaweraitanieéna Wenabo míéhrabeq íopeq suena wehukení úkéna arambehri aní tahnsa úkúwe.

<sup>8</sup>We wehukení úkéna mah marákóipéq míotaq íre píribahri anínéna peh Wenabo awahbeh sansá ahriahri tábúsoqme miraúwe. Miraúnsabe awankátaq táhpague putiowe. <sup>9</sup>Minayabe Manikánka Sísá iriatena wega wahnahnirabeq móatowe. Móatena anotah aní míahno ato puana wenáwíqka moke mó ke síwíq kiotaikire.

<sup>10</sup>Minayabe moke íopeqté kéreq mah marákó marákóipéqté kéreq iraipéqté kéreqka sirehunseraráq méra Sísá áwíq pankeragéhe.

<sup>11</sup>Pankerera, Sísá Karáhé aiq pútaq anotah Wahnáh míre pahsuqme irarigehe. Irariranka Maniká Iteribo áwíq pankeragéhe.

#### **Kaweqtaq méq eyoyóue arambehrioro i ehwéhne.**

<sup>12</sup>Néne iyahnabo anímárinó, iteba míarautaq néne ehwehme kawerue sehgirowe. Amahnága iteba íre míótáqkákák moq kawerue sehgióro. Oga mía míaoneheéq wene ehwehnsabé áhreue iransánéq kawerue sehgióro.

<sup>13</sup>Itega Maniká awahbeh sansá kawerue ireq tábúsoqme miraigeheéna wega itene irupipeq ména ahriahri séhréh aitéhre. Minayabe wene ehwehnsabé áhreue iransánéq kawerue sehgióro.

<sup>14</sup>Itega arambehriirataq íre síéhruruoro. Ire síéhruruéq peh ahriahri eyoyóue arambehrioro. <sup>15</sup>Mah marákó marákóipéq áhnte ahbábáq kéreq ahkaragára kereq míáhwe. Itewe se míáhtáq mirao serahniyehboq peh Manikáne kaweq anímári míáthro. Wene kaweq anímári méq ite íre ahbabária peh kaweqtaq mía míaonehéq eyoyóue arambehrioro. Wehyoqka íopeq téhréna ábóraq kéhnserah ahbabáq ke míáhrabeq itene kaweq arámbéhrí ábóraq kéhra q oga mía mía ehwéh teri terinowe.

<sup>16</sup>Minayabe Sísá Karáhé tuinagake néne arambehriyabé kaweróne aintankéhe. Itega oga mía mía ehwéh kawerue pahsúáhnsabé néne arambehri íre abehq úkia peh ábóraq kéh púana iwíáh íwíáhinie.

<sup>17</sup>Itega Sísane sánsá kawerue sehgiageheéna séhréh aitaráuge. Séhréh aitaráunsabé ahbabáq kega nubiq suaneherabowapómo. Anetaníbo. Itereq iwíáh íwíáhéna nirupipeq eyoyóire. <sup>18</sup>Ite moq iwíáh íwíáhoró. Ínéreq iwíáh íwíáhéq itene irupipeq eyoyóue iwíáh íwíáhoró.

#### **Poraga Tímóti Pírípái suwahpeq eqmaraníe ú ehwehne.**

<sup>19</sup>Itene Wahnah Sísaga iwíáh aintahnana Tímóti mótaq iteba eqmaraníe. Wegá itene arambehri tagéna ínéba kouwekue sereninkéhe. Íráhnaraq nirupipeq eyoyóinae. <sup>20</sup>Tímótiga íné iwíáhunserahnéna ite kaweqtaq méyabe arutaboirena, Árahue Pírípái ke séhréh aritanínkono iwíáhire. Mó mina tahnsa íwíáho kewé ínéreq íre míáhwe. <sup>21</sup>Sega íre Sísá Karáhéne arambehri peh seyene arambehriyabé sirutaborowe.

<sup>22</sup>Sísane kaweq ehwéh teri teri arámbéhríurautaq Tímóti nénahni tahnsanéna séhréh aintaráire. Séhréh aintaráinsabé itega wene sánsá tagaríáhwe. <sup>23</sup>Minayabe áwénunéna, Mahtaq ínéba aneqpopoq kanabirapómo éna Tímóti iteba eqmaraníe. <sup>24</sup>Ínéga iwíáhume itene Wahnah Manikánka íné séhréh aintahnana ínéga moq iteba mótaq koragane.

**Poraga wehukení wenáwíq Épápóríta Pírípái  
suwahpeq eqmaraníe ú ehwehne.**

<sup>25</sup>Épápórítaga íné séhréh aintankeheéq itega ínéba eqmaq áúwátówe. Eqmaq áúwátówana we náníbáq tahnsa mívarirata moraráq arambehriurauye. Wega itensabé anotah arútábóiri puana amahnága iteba eqmaraníe iwíáhuge. <sup>26</sup>Wega itensabé anotah arútábóiréna ite tageyabe awahbehre. We awahreuraire uro ehwéh írátónsabe wene arupipeq iwíáh kikirire.

<sup>27</sup>We aiq pútaq awahreéna peh áura pukuraire. Manikánka wensabé arutaboírurainsabé we kaweratáráire. We pukuraitaq tahirímé nirupipeq áhnte pagégéurai irino. Minayabe Manikánka íre peh wensabé arutaboíréna ínénsabe moq arutaboíraintáráire. <sup>28</sup>Itega we tagéq itene irupipeq eyoyóinkeheéna iteba eqmaraníe. Itene irupipeq eyoyóinayabé néne nirupipeq umehime moq eyoyóinae.

<sup>29</sup>We itene Wahnahne ani míéhnsábé eyoyóue mehweh atáhiro. Mina tahnsa ké síwíq pankereq sensabé iwíáh iwíághoro. <sup>30</sup>Ite íre wahto míáh púaq íné íre séhréh aintahráhowe. Minayabe itega Épápórítansabé, Koséhréh ato éq ínéba eqmaq áúwátówana wewensabé íre iwíághire. Írakaumo. Peh íné séhréh aintena Sísá Karáhéne arambehri miraurainsabé áura pukuraire. Minayabe ayahmaq aweq iwíáh iwíághoro.

**Sísansabé aiq pútare atáh kéwé kaweq ke wóe i ehwéhne.**

**3** <sup>1</sup>Néne iyahnabo anímárinó, mó ehwéh kéhre. Itene Wahnahnsabé iwíáh iwíáh ateq itene irupipeq eyoyó ke míághro. Métáq sehiranue teí éhwéh mónkakák séhréh aitanieéna teiníe. <sup>2</sup>Ahbabáq aruqaruro ke, úrinsi iánká tahnsa sánsáno kegá péhe sánsá aitehboq auráq matíághro. Segá, Ite Asiu kené sánsánéq íú amurúruághro ue pagu paguno ke wóe. <sup>3</sup>Manikáne Awanka séhréh aitéhraq itega Manikánsabe iwíáh iwíáh ateq Sísá Karáhé áwíq pankerone. Minayabe ite Manikáne animári míone. Ite tagarionawe síú amurúruáh sánsánká wehuke íre séhréh aritahrághire.

<sup>4</sup>Teiníboq írátíághro. Wehukega mirao sansánká kawerarítéhtáq tahirímé ínéga miraurau sansánká íné aiq kaweraintarái irino. Ínéga miraurau sansánká áhnte mó kegá mirauro sansá aiq kiotaikuraire. <sup>5</sup>Náinoibo akéq Pénsámíni kahnáh ákéq Asiu anité wóye. Náinoga íné maqmarotaq abapeqte apahtáro wéhékáh sótaikútaq níú amurúruówe.

Náinoibo akéqká Íbaru ehwéh Asiu kené ehwehnóyansabé ínéga moq Íbaru kené ehwehnuge. Anonútáutaq Mósísiga sehgióro ú ehwehnsábé Péhrasi kené sánsá kawerue miraurage. <sup>6</sup>Manikáne arambehri págegeue mirauge íwiáhéna Sísá tagaríáh ké síwíoqnarage. Mósísiga sehgióro ú ehweh íre anterusa peh kawerue sehgirauge. Wehukega néne sánsá iwíáhue tagéra ahbabáq anine íre orahurowe. <sup>7</sup>Minayabe ínéga iwíáhuraume, Íné kaweqtaq míóge urauge.

Amahnága Sísá Karáhéne sánsá miraunsabé néne naho kiotaikurai sánsá abehq náneq úkire íwiáhuge. <sup>8</sup>Íre peh morá néne naho sánsá abehq náneq úkire. Írakaumo. Moke mó sánsá abehq náneq úkire íwiáhuge. Itene Wahnah Sísá Karáhé tagaríó sánsánká moke mó sánsá kiotaikirana moke mó sánsá abehq náneq úkire. Sísá Karáhéne sánsá sehgiónsábé moke mó sánsá abehq náneq tahnsáne íwiáhéna sutauge. Peh morá Sísá Karáhénsabe nirutaboiréna mó sánsá sutauge. Peh wereq mía mífainiéena sutauge. <sup>9</sup>Suena amahnága íné Sísareq mía míaéyabe nuwahbehre.

Mósísiga sehgióro ú ehweh sehgiúnká, Kaweqtaq míahne aintahráhiro? Írakaumo. Peh Sísá Karáhénsabe aiq pútare ataráunsabé Manikánka, Kaweqtaq míahne aintaráire. <sup>10</sup>Sísá Karáhé tagarawéyabe nuwahbehre. Manikánka Sísá iriato púana wega págege aintahráhire. Págege aintahnayabé níre. Íné wene iyahnabo aní míó púara mó kegá Sísá áwíoqnonserah níwíoqnagehe. Sísaga we puké tanahráqsábé iwíáhurainserah íné moq mina tahnsa íwiáhinie. <sup>11</sup>Ínéga iwíáhume mókake íné moq iriintena oga mérapeq móintanawire íwiáhuge.

### **Poraga, Tauntahu arámbéhríinie ú ehwehne.**

<sup>12</sup>Sísá Karáhé tahnsa amahnága íre úkuge. Ahriahri kaweqtaq mía míau aní amahnága íre úkuge. Peh kaweqtaq méyabe nuwahbehre. Sísá Karáhéga omaq intena kaweraintarái puana ínéga págegeue arambehriuge. <sup>13</sup>Néne iyahnabo anímáríno, amahnága Sísá tahnsa íre úkuge. Íné peh morá íwiáh kéhre. Menah tanáhráqsábé anetaníbo íwiáhéna peh morá mókakeyabé iwíáhue págege arámbéhríuge. <sup>14</sup>Sísá Karáhéne sánsá kawerue sehgiúnsábé Manikánka ínénsabe, Kaweróne. Íópeq mahbeq kio. Ínéba mía míaúno aintanawire. Mi tanáhráq nina apéqsábé iwíáhue págege arámbéhríuge.

<sup>15</sup>Tábúsoqme iwíáhoraho keo, itega moq mina tahnsa íwiáhoró. Itega mó iwíáhirataq minayabe Manikánka sokigi aitankéhe. <sup>16</sup>Itega kaweqtaq mía míauraunanserah mókakeakáq kawerue mía míaoneheqmúne íwiáhoró.

<sup>17</sup>Néne iyahnabo anímáríno, iteba míarautaq néne sánsá tagarowe. Mitaq ínéga mía míauraunserahnue míáhro. Miraurau sánsá miraira ke kawerue tagarawéq sene ehweh íráhro. <sup>18</sup>Sísá Karáhéga itene ahbabáqsabe awankátaq táhpawe pukú ehweh áhnte kegá íre irera peh

ahbabáq aruqaruowe. Minayabe sega Sísa Karáhéne naruo úkowe. Mi ehwéh menah teiena amahnágaákáq nirupipeq umehirana mónkakáq teiúge. <sup>19</sup>Sinonkanka suwahbeh naneq mira aruqaruro puana minawé sene maniká tahnsa úkire. Mah marákóipéqté náneqmarínsábé iwíáh iwíáhéra sene siyehiteh sansánsábé iwíáh iwíáh atáhwe. Mi sansáno kega iraipéq pokoneherawoe. <sup>20</sup>Iteitene irutaboiri matábúwé íopeq kéhraq mitaqté sánsánúne. Mibeqté ite kaweritéh ání, itene Wahnah Sísa Karáhéga tuinawire. Wega tuina tanáhráqsábé irutaboiréq áwénunúne. <sup>21</sup>Itene mareqmareq pukorahi inónká wene págegeue kagai anonká tahnsa úqitankéhe. Sísa Karáhéga moke wehukeakáq ménsámehnsánkakaq págegeue wahnahnorahi puana wega itene mareqmareq inónká págegeue kagai anonká úqitankéhe.

#### **Itega peh morá iwíáhéq iru eyoyóue iahtebahro i ehwéhne.**

**4** <sup>1</sup>Néne niruní iyáhnábó ánímárino, itensabé nirutaboiruge. Itega Sísane sánsá kawerue sehgió púana nirupipeq iwíáh iwíáhue eyoyóire. Néne niruní iyáhnábó ánímárino, mókakeakáq kawerue sehgióro.

<sup>2</sup>Iyúóriareq Sintíkireq korenitéo, néne ehweh íráhtao. Itene Wahnah peh morá ání mire. Minayabe uwareasa ínité méta peh morá iwíáhota. <sup>3</sup>Néne weho, mi ínité kawerue séhréh arito. Sega íné séhréh aintároye. Sísane kaweq ehwéh teri terinurataq sereq Kéménareq ínéreq arambehrio kereqka séhréh aintárowe. Oga mía míaoneherao kené síwíq kéh púkúipéq Manikánka sensíwíq aiq sehiranaréhre.

#### **Iwíáh kikiriyehboq Manikánsabe teawéro i ehwéhne.**

<sup>4</sup>Ahriahri itene Wahnahnsabé iwíáh iwíáh ateq itene irupipeq eyoyóo ke míáhro. Mónkakáq teiníboq írátíáhro. Itene irupipeq eyoyóo ke míáhro. <sup>5</sup>Ómiga tagagehboq uwareasa ánímárí mía míaoro. Itene Wahnah tuina tanáhráqmé peh áhnbóránire. <sup>6</sup>Itene irupipeq iwíáh kikiriyehboq moke aru págegeorahi naneqsabé Maniká teawéro. Wensabé iwíáh iwíáh ateq ite iwíáho naneqsabé teawéro. <sup>7</sup>Mirairataq Manikánka itene iru ukiq itankéhe. Iru ukiqite sansa áwahewé íre iahtebahrahúne. Manikánka itene iru ukiq itahnaga ite Sísa Karáhéreq mía míaúnana itene irupipeq íre iwíáh kikirúne. Írakaumo. Peh iru ukiréhraq míone.

#### **Peh kaweq naneqsabé iwíáhoró i ehwehne.**

<sup>8</sup>Néne iyahnabo ánímárino, mó ehwéh kéhre. Teina kawéq náneqmarínsábé iwíáhoró. Aiq pútaq ehwéhmé, séhréh arite sansámé, kaweqtaq mía míaome, tabasíwe mía míaome, kaweq naneqmarínsábéwé, kiotaiki sansámé, uwaréqme, mía míaome, minawarinsábé iwíáhoró. <sup>9</sup>Iwáhnoruraugaq írátó ehwéh sehgióro. Ínéga miraurau serahnoro. Mirairataq Manikánka iteba mía míaéna itene iru ukiq itankéhe.

**Poraga Pírípái kegá we náwa náwanunsabé iwíáh íwíáh ú ehwehne.**

<sup>10</sup>Itene Wahnahne arambehri mirainkeheeq mónkakák níátówe. Minayabe nirupipeq eyoyóue itene Wahnahnsabé iwíáh íwíáh atóge. Menah moq itega ínénsabe irutaboiraiteq peh mi tanáhráq íre nieráhurowe. <sup>11</sup>Íne tabonah aní míónsábé mi ehwéh irarugo? Írakaumo. Íné tabonah aní míarautaqqákákq nirupipeq íre umehire. Ahriahri niru eyoyóire.

<sup>12</sup>Íné tabonah aní míarautaqqákákq áhnte káráitaqqákákq monseráhnue niru pehwehruwe eyoyóire. Niyahbankiréh sánsánkákákq nirupibi sansankákákq tagaríóge. Áhnte kéh tánáhráqqákákq tabonah tanáhráqqákákq tagaríóge. Moke mi tanáhráq monseráhnue niru pehwehribeq eyoyóire. Minayabe niahtebarauge. <sup>13</sup>Sísaga págege aintahráhire. Peh wewega págege aintéhnká ínéga moke miraorahuge.

<sup>14</sup>Íre kaweq sunúq káráitaq itega íné séhréh aintaronsabé kawerurowe. <sup>15</sup>Másérónía suwahpeq suena Sísane kaweq ehwéh téh teri terinurautaq itega nání náninurowe. Ite Pírípái suwahpeqte kegá tagaríáhmé mó Sísá tagaríáh kegá íre náníátówe. Írakaumo. Peh itebataq nání náninurowe. <sup>16</sup>Íné Tésárónáika suwahpeq ména tabonah aní míarautaq itega séhréh ainteq mótaq mótarue nání náninurowe.

<sup>17</sup>Íre peh íné nání náninuro naneqsabé nirutaboiruge. Írakaumo. Peh morá itega nání náninuronsabé kagai apéq mókake meyangéhe. Minayabe iwíáhume nuwahbehre. <sup>18</sup>Épápórítaga itega eqmato naneq níátáinsabé amahnága áhnte matíóge. Itega Manikánsabe iruí púaq áhnte náníátówe. Minawé Maniká awahbeh sansáne. Itega mirauronsabé wega kawerowe aitéhre.

<sup>19</sup>Sísá Karáhé áhnte matíéh aní mía míaire. Minayabe Maniká Nániboga ite íre kéh náneq moke náinkéhe. <sup>20</sup>Maniká Iteribonsabé ahriahri iwíáh íwíáh atanéhe. Aiq míre.

**Poraga Pírípái keyábé iroto arito ehwehne.**

<sup>21</sup>Ínéga moke mibeqté Sísá Karáhé tagaríáh keyábé iroto uge. Moke ínereq mahtaqté Manikáne animárínká moq itensabé iroto ewe.

<sup>22</sup>Mahtaq anotah wahnáh aní Sísáhrine nahtapeq méra wene arambehri mirao kereqka íné pagunera itensabé iroto terio ewe. Ómi mahtaqté Sísá tagaríáh kegá itensabé iroto ewe.

<sup>23</sup>Itene Wahnah Sísá Karáhéga itensabé arutaboiréna itene irupipeq mía míaeána séhréh aitéhre.